



Mai 1902.

Deß also soll es Friejhohr sei"
Mit Blummeduft un Sunneshei"
Un Nachdigallielierer;
Ma", heeren mol ehr Brierer,
Wer so waß glaabt un dodruff heert,
Uff deitsch gesaht, iß a"geschmeert,
Der kann mit seine Bosse
Sich glei' begrawe losse.

Wääs Gott! es werd em winn un weh
Der Durchenanner vun Re'e un Schnee
Un Dreck und derre Blädder
Iß iwerhaubt kä" Wedder;
Kä" Grie", wo d' net verfroore siehscht
Un Maikämmer, wann d' ähner friehscht,
Kannscht dum e Wunner saache
Un in die Zeidung draache.

Die Zeidunge, ja abbrobööh,
Denne geht ebbes aah noch nooh,

Deß hääßt, es dhut 'n fehle,
Ebbes for scheene Seele:
Jed' zwett Gedicht, wo se gebrung,
Hott sunscht vum scheene Mai gesung;
Heit wissen se nor so schreibe
Bun Schnee- und Schloosbedreime.

Ich will nor eijentlich mol sieh
Biß wann mer anner Wedder frieh';
Dann, daß mer Paul und Perer
Hann un noch Winderkläärer,
Deß iß mer aah noch net bassiert
Un kann doch, ohne rennommiert,
Bun gut und schlechte Daache
Aah e gut Dhääl verdraache.

Drum heil'ger Petrus, geh in dich,
Heer uff mit denne Schbring un Schlich
Un gebb uns anner Wedder;
Sunscht hääßt's in all de Blädder:
De alde Petrus daugt nix meh,
Grum iß mit seiⁿm Renommee;
Denn muß mer pansioniere,
Sunscht dhut er uns blamiere.
